

FAMILIA SANTUA: JESUS, MARIA ETA JOSE (B)

Jaia

Otoitza

Jainko gure Aita,
 Familia santua eman diguzu jarraibide eder;
 egizu, gure familietan ere
 famili bizitza zintzoan eta elkarren maitasunean hari jarraituz,
 betiereko zoriona izan dezagula zeruetako etxean.
 Zure Seme Jesu Kristo.

I. IRAKURGAIA: Si 3, 3-7. 14-17a

*Jaunaren beldur denak
 goresten ditu bere gurasoak.*

Siraken liburutik

Goresgarriago egiten du Jaunak aita,
 seme-alabak baino;
 eta amari eskubidea ematen dio
 bere umeen gainean.
 Aita goresten duenak
 bere bekatuak ordaintzen ditu;
 eta ama goresten duenak
 ondasunak pilatzen.
 Aita goresten duenak
 poz izango du bere seme-alabetan;
 eta otoitz egunean entzun egingo zaio.
 Aita goresten duena luzaro biziko da;
 eta Jaunak entzuten dio,
 amari atsegin ematen dionari.
 Ene seme, iraun zeure aita goratzen,
 eta ez utzi bizi daino.
 Burua galtzen badu ere,
 izan zakizkio bihotz haundiko
 eta ez gutxietsi bizi zareino;
 aitari emandako laguntza ez da ahaztuko,
 bekaturen ordain izango duzu;
 zoritxar egunean,
 gogoan hartuko dizu Jaunak.

ERANTZUN SALMOA: Sal 127, 1-2. 3. 4-5

**R/. Dohatsu, Jaunaren beldur dena,
 Haren bideetan dabilena!**

Dohatsu, Jaunaren beldur dena,

Haren bideetan dabilena!
Zure eskuen lana baituzu jango,
zoriontsu izango zara eta ongi zaizu joango. R/.

Zure emaztea, mahasti emankorraren antzean,
zure etxe barnean;
zure seme-alabak badirudite olio kimuak,
zure mahai inguruan. R/.

Begira, hala izango da bedeinkatua gizakia,
Jaunari beldur diona.
Jaunak Siondik bedeinka zaitzala,
Jerusalen dohatsu ikusiz beti bizi zaitezela. R/.

II. IRAKURGAIA: Kol 3, 12-21

Familiako bizitza, Jaunarengan bizia.

San Paulo Apostoluak Kolosarrei

Senideok: Jantzi zaitezte bihotz errukitsuz, onberatasunez, apaltasunez, egokitasunez, eraman onez, Jaungoikoaren herri aukeratu, santu eta maitea zaretenez gero. Eramazue ondo elkar eta barkatu batak besteari, inork inorentzat ezer baleuka. Jaunak barkatu dizuen bezala, barka zuek ere.

Guzti horien gainetik, ordea, izan ezazue maitasun; hori baita lokarririk bikainena. Kristoren bakeak agindu beza zuen bihotzetan, bake horretara deituak zaretenez gero gorputz batean; eta izan esker onekoak. Oparo bizi bedi zuengan Kristoren hitza: jakinduriarik osoenean elkar argituz eta berotuz; salmoak, goratarreak, eta goi arnasezko abestiak Jaungoikoari bihotzez eta eskerronez kantari. Edozer esaten edota egiten duzuela, egizue dena Jesu Kristo Jaunaren izenean, Beraren bidez Jaungoiko Aitari eskerrak emanez.

Emazteok, zaudete zeuen senarren menpean, Jaunarengan egoki den bezala. Senarrok, maita itzazue zeuen emazteak, eta ez izan gogorrek haiekin. Seme-alabok, egin zeuen gurasoen esana gauza guztietan, hori nahi du eta Jaunak. Gurasuok, ez sumindu zeuen seme-alabak, gogoia gal ez dezaten.

EBANJELIOA: Lk 2, 22-40

Aleluia: Kol 3, 15a. 16a

R/. Aleluia.

V/. Kristoren bakeak agindu beza zuen bihotzetan;
oparo bizi bedi zuengan Kristoren hitza. R/.

Haurra hazten ari zen, eta jakinduriaz betetzen.

Jesu Kristoren Ebanjelioa San Lukasen liburutik

Mariarentzat, Moisesen Legearen arabera, garbikundeko egunak bete zirenean, gurasoek Jerusalemara eraman zuten Jesus, Jaunari aurkezteko [–Jaunaren Legean idatzirik baitago: «Lehen semea Jaunari eskainia izango da»–, eta opari egiteko –Jaunaren Legeak agintzen duen eran: «Bi usapal edota bi usakume»–.

Simeon izeneko gizon bat bizi zen orduan Jerusalemenean, gizon zintzo eta jainkozalea, Israelen poza itxaroten zuena, eta Espiritu Santua berekin zuena. Espiritu Santuak adierazi zion ez zuela heriotzarik ikusiko, Jaunaren Mesias ikusi arte. Eta Espiritu Santuak eraginda jauretxera joan zen. Gurasoek Jesus eraman zutenean, Legeak agindua Harekin betetzera, hartu zuen Simeonek haurra besoetan eta Jaungoikoa bedeinkatu zuen, esanez:

«Orain utz dezakezu, Jauna,
morroi hau bakean joaten,
Zeuk hitzeman bezala.
Ikusi baitute nire begiok Zuregandiko salbamena,
herri guztien aurrean ipini duzuna:
Atzerriak argitzeko argia,
eta zure herri Israelen edergarria».

Haurraren aitamak harriturik zeuden, haurrarenatik esaten zirenekin. Eta Simeonek bedeinkatu zituen, eta haurraren ama Mariari esan zion: «Begira, israeldar asko erortzeko eta beste asko altxatzeko ipinia dago hau; eta eztabaida sortzen duen ezaugarri izango da, horrela bihotz askotako asmoak argitan ager daitezten; eta zerorri ezpata batek alde zuzatuko dizu arima». Bazen emakume profeta bat, Ana zeritzana, Fanuelen alaba, Aserren jatorrikoa. Adin haundikoa zen; gazte-gazterik ezkondua, zazpi urtez senarrarekin bizi izan zen, eta orain bazituen larogietalau urte, eta alargun zegoen. Gau eta egun jauretxean zegoen, barau eta otoitz, Jaungoikoa zerbitzatzen. Ordu hartan han gertatu zen, eta Jaungoikoa goستن eta haurraz mintzatzen hasi zitzaizen Israelgo askatasunaren zain zeuden guztiei.]

Dena Jaungoikoaren Legeak agintzen duen bezala bete zutenean, Galileara itzuli ziren, beren herri Nazareta. Haurra hazten eta indartzen ari zen, eta jakinduriaz betetzen; eta Jaungoikoaren grazia Harekin zegoen.

Oparigaien gainekoa

Bakezko opari hau eskaintzean, Jauna,
apal-apal eskatzen dizugu:
Jainkoaren Ama Maria Birjinaren
eta Jose dohatsuaren otoitzez,
gure familiak zure adiskidetasunean eta bakean
sendo ezar ditzazula.
Jesu Kristo.

Prefazioa: Eguberrialdikoa

Jaunartze ondorengoa

Aita guztiz ona,
sakramentu honen bidez indarberritu gaituzunok
Familia santuaren antzera bizi gaitezela,
lur honetako estualdien ondoren
Berarekin batean betiko zoriona irits dezagun.
Jesu Kristo.